



新畫山脈圖志

ル 5
3546
4



門 5
號 3546
卷 4

新疆山脈圖志卷四

新城王樹枏



南山

南山之首曰烏仔別里之山

帕米爾山水道里記烏仔別里山豁土人指說不一有謂為木子可爾者有謂為克子別里者更有指在瑪爾堪蘇之烏赤別里者皆非也中俄止界處所按照圖約及山水形勢考測確在本圖所繪地位無疑俄人謂即黑仔吉牙克或其邊民嘗以是呼之異地同名事所恆有然必併在梁上不得

山脈圖

一陶

廬

以圖約中有克則勒吉業克字樣

克則勒吉業克又名克仔別里布同以克則勒

為紅色吉業克為長石一線別里為小嶺克則勒吉業克者言紅長石一線也

誤認分支東下及麓牽

混中國設卡之黑孜吉牙克地方顯背同指山梁

為界之約再據押圖細考紅綫止處恰在哲理威

河東北第一支分水源頭足見中俄未段界址以

此水分亦即以此水止尤足執為烏仔別里山豁

非黑孜吉牙克鐵券

疏附鄉土志烏仔別里距城六百四十里東北至

喀喇租庫六十里

案烏仔別里土人呼伯什別里在和什庫珠克

東南二百四十里東距喀什噶爾八百九十里

東南至讓庫爾一百八十里攷帕米爾北界一

自烏仔別里山起順大嶺梁經由倭伊巴勒孔

阿里木圖阿哈比爾卻和太喀喇蘇沙各達坂

係布魯特與住布倫庫爾木吉黑纏交界舊址

亦即喀什噶爾道舊管南界一自烏仔別里山

起西南順大嶺梁經由哲里威與阿克巴依塔

爾兩河分水處過塞勒子巴哈瑪爾濟奈西南

至塔什庫爾干為止本布魯特與什克南交分

舊址亦即約圖中俄界轉向西南之山幹帕米

山脈四
爾東界自喀喇蘇沙西南砂嶺分水處起北界
卻和太達坂南至克克突聿克達坂係布魯特
與莎車屬塔齊克部民交分舊址亦卽喀什道
舊管西南及正西邊界內所經之喀因噶爾別
爾解西新底丕伊克克里克等達坂支幹紛岐
起伏不一其界綫係取正嶺梁分水爲界帕米
爾南界自克克突聿克達坂起至伊阿伊里與
喀喇崗蓋兩山梁交會盡頭處下山至愷里對
宛順南流水至波咱拱拜上山經阿企克庫伊
里克兩達坂再順搶庫爾南之大嶺由乙更阿

拉魯水口過海里果什至庫爾帖節克山係布
魯特與瓦罕什克南兩部落交分舊址其自克
克突聿克達坂以東所有倭海及蕊明鐵蓋兩
達坂係當日與坎巨提舊有界限亦卽喀什噶
爾道舊管不與帕界相涉帕米爾西界無多取
布勒滿山北之伊克瑪爾濟奈水南接庫爾帖
節克北交塔什庫爾干兩山梁爲界亦係布魯
特與什克南交分舊址帕米爾地縱橫八百餘
里喪於沙大臣之一言致啟英俄兩國之爭鶴
蚌相持至今未決籌邊者宜豫爲桑榆之計也

又案漢書西域傳三十六國南北有大山其山
南東出金城與漢南山屬焉自玉門陽關出西
域從鄯善傍南山北波河西行至莎車爲南道
西域圖志云漢時所謂南山者皆自葱嶺分支
其北山由疏勒尉頭溫宿龜茲焉耆車師六國
東行卽今喀什噶爾阿克蘇庫車喀喇沙爾關
展一帶北境之山其南山由西夜莎車于闐扞
彌戎盧精絕鄯善諸國東行卽今葉爾羌和闐
之南入砂磧歷安西州敦煌玉門縣南境之山
漢書武帝紀貳師將軍出酒泉與右賢王戰於

天山師古曰卽祁連山匈奴謂天山者指北山
而言若西域傳所云東出金城與漢南山屬又
從鄯善傍山西行爲南道者止稱南山隋書載
福祿縣有祁連山而晉書地理志載張祥以敦
煌郡爲商州張元靚以商州爲祁連郡唐書福
祿縣東南一百二十里有祁連山乃以近南山
而被名於是南山亦號天山與漢時之以北山
爲天山者同日祁連而實分兩幹也今西域回
部諸國皆在南山之北卽漢書所謂南有大山
也東至涼甘肅州皆與此山爲一脈卽漢書所

謂與漢南山屬也自安西州境外西南行綿亘沙磧直抵葱嶺卽漢書所謂從鄯善傍南山北波河西行至莎車爲南道者也茲本漢時之舊以北山爲天山而於三十六國南境之山止稱南山庶幾稱名近古而彼此不淆一統志旣稱溝二衛南蓋以一山分支各就所隸之境而言其實未嘗有兩山耳

又東南曰倭伊巴勒孔之嶺有水焉東流入於木吉河帕米爾山水道里記倭伊巴勒孔達坂東北距喀什

什噶爾八百三十里東南接讓庫爾爲喀什道舊

管內地界

又東南曰阿里木圖之嶺阿里木圖水出焉東北流入於雅滿雅爾河

帕米爾山水道里記阿里木圖達坂東北距喀什

噶爾七百三十五里西南接讓庫爾爲喀什道舊

管內地界

又東南曰阿哈比爾之嶺

帕米爾山水道里記阿哈比爾達坂東北距喀什

噶爾五百七十里西南接讓庫爾爲喀什道舊管

內地界

又南曰卻和太之嶺

帕米爾山水道里記卻和太達坂東北距喀什噶爾五百八十里西南接讓庫爾為喀什道舊管內

地界

又東南曰喀喇蘇之嶺有水焉北流伏於戈壁

帕米爾山水道里記喀喇蘇分水處東北距喀什噶爾七百四十五里西接讓庫爾為喀什道舊管

內地界

又東南曰喀因曼爾之山有水焉東流入於賽里河

帕米爾山水道里記喀因曼爾山口北距喀什噶爾六百八十里西接帕米爾界為喀什道舊管內

地界

又東南曰別爾解西之山

帕米爾山水道里記別爾解西山口北距喀什噶爾七百八十五里西接帕米爾為喀什道舊管內

地界

又東南曰申干之嶺

帕米爾山水道里記新底達坂北距喀什噶爾八百八十五里西接帕米爾為噶什道舊管內地界

蒲犁鄉土志城西六十里達申干卡層嵐疊嶂土
民稱爲西山卽往俄國要道

案申干卽新底或作新干游擊張鴻疇云由蒲
犁城至申干嶺八十里以蒲犁東距莎車府城
八百里計之則廳城至嶺當八十五里也

又南曰丕伊克之嶺有水焉東流注於賽里河

帕米爾山水道里記丕伊克達坂北距喀什噶爾
一千一百五十里西接阿克蘇阿克塔什爲喀什
道舊管內地界

案丕伊克一作坯一克亦作排克其山有草可

牧勘界公牘云色勒庫爾卽今蒲犁城南行一百九

十里至和家克巴依卡向西南進山口一帶爲
塔墩巴什六十里至丕伊克山口轉向西北行
八十里至丕伊克達坂

又西南曰鐵克里滿蘇之嶺有水焉東北流入於賽里
河

案鐵克里滿蘇嶺爲喀什道舊管內地界西通
阿克蘇阿克塔什

又西南曰克克突聿克之嶺有水焉東北流入於賽里
河

帕米爾山水道里記克克突聿克達坂東北距喀什噶爾一千二百八十五里西北接帕米爾為喀什道舊管內地界

案克克突聿克一作可克土魯克一作可可特勒可有草可牧

又西南曰阿格吉勒之嶺其東巴格志之泉水出焉東北流入於賽里河

帕米爾山水道里記阿格吉勒達坂東北距喀什噶爾一千二百七十里西南接瓦罕為喀什道舊管內地界

案阿格吉勒一作倭海及蕊蒲犁廳圖作瓦罕吉爾英人楊哈斯班游記作瓦呼羅特有草可牧

又東南曰克里克之嶺有水焉北流入於賽里河

帕米爾山水道里記開里克達坂北距喀什噶爾一千二百八十五里南接坎巨提為喀什道舊管內地界

案開里克即克里克一作克列克勘界公牘云由明鐵蓋阿格嘴向西行七十里轉向正南進山口至克里克達坂通坎巨提仍折回向西行

二十里至克克突聿克阿格嘴轉向西南行六十里至阿格吉勒達坂山梁稍東一海子通瓦罕

又東南曰明鐵蓋之嶺有水焉東北流入於賽里河

帕米爾山水道里記明鐵蓋達坂北距喀什噶爾一千二百四十里南界坎巨提為喀什道舊管內地界

蒲犁鄉土志明鐵蓋達坂在城南二百六十里再南行一百餘里有穆斯塔格山均極險峻由坎巨提入境要道也

案勘界公牘云由丕伊克山口向西行七十里至明鐵蓋阿格嘴向正南行一百里過明鐵蓋達坂通坎巨提纏回謂山逾千尺者曰明鐵蓋許圖作明塔曼

又東南曰紅孜納普之嶺有水焉北流入於賽里河

案紅孜納普一作渾居拉普許圖作渾楚鄂帕有草可牧南通坎巨提勘界公牘云和家人克巴依卡南行一百四十里至它斯曼有塔齊克遊牧數戶一百二十里至乙壘沿河一帶草足薪缺轉向西南行六十里至紅孜納普達坂蓋北

距蒲犁城五百一十里也

又東南曰星硤之嶺有水焉北流入於澤普勒善河

案星硤嶺許圖作烏帕朗卽帕米爾達坂英人

楊哈斯班遊記作土穆沙落內有草場可牧坎

巨提人砌有小石房三十間以爲牧養歇宿之

所勘界公牘云由色勒苦木什布拉可東南行

九十里至星硤阿格嘴

英人遊記作蘇格木準噶爾

柴草均足向

南行五十里至星硤卡倫坎巨提尾卡設駐於

此卡外深溝一道約深十餘丈寬五六丈曲折

而下盤旋而上極險要卡門啟閉無人由此轉

向西南行約六七十里至星硤達坂通坎巨提

後部此嶺東流折而北流之水與阿格里嶺西

北流水會於星硤阿格嘴入澤普勒善河其由

葉城縣向西南歷庫庫雅卡越英艾達坂渡澤

普勒善河向東南轉正南折西南至星硤達坂

計程一千二百餘里議者謂托和柰克通庫庫

雅之道爾帶克沙的通怕合浦之道八扎塔拉

通喬堡之道此三道草柴均足若築堡設卡於

此可扼坎部由星硤各達坂入葉城之道案自

星硤以西通坎部諸山統名曰穆斯塔格自卡

拉胡魯木以東通條拜提諸山統名曰哈喇科
隴卡拉胡魯木謂冰山也哈喇科隴或作哈喇
昆侖蓋由昆侖得名

哈喇山

西域圖志齊齊克里克達巴在哈喇塔克東南一
百里英吉沙爾廳圖哈喇達坂東北距城三百一
十里與蒲犁界

齊齊克里克山

一統志齊齊克里克在喀什噶爾西南
新疆圖說齊齊克里克在莎車州今改城西南八百

餘里托布倫河經其南

案齊齊克里克為英吉沙爾及蒲犁之分嶺當
孔道北準語齊齊克花也里克多有也一統志
謂喀什噶爾西北北當為南字之誤西域水道
記云僧格喀巴布山當和闐正南過和闐西北
趨千六百餘里發為齊齊克里克嶺此蓋以岡
底斯為昆侖發脈也

鐵列克山塔斯滾

一統志作提斯滾

及排斯拉巴特兩水出焉

新疆圖說塔斯滾水在英吉沙爾城南一百里其
源出坎科布魯特部落鐵列達坂東流為夏納斯

渠分溉城南各莊田畝排斯拉巴特河亦出鐵列
嶺東流與澤普勒善河會

案西域圖志云特勒克達巴在齊齊克里克東
一百里一統志云特勒克嶺在葉爾羌西北當
孔道北特勒克爲鐵列克之變音新疆圖說云
鐵列克卽特拉克蓋一山也山南卽蒲犁境托
布倫河過之此山乃由齊齊克里克東北分支
東南卽黑子爾鐵里牙諸山一統志所謂在葉
爾羌西北也

阿合買提山其下多鐵

英吉沙爾鐵礦圖說阿合買提山在治南一百一

十里有塔什渾河

卽塔
斯滾

由鐵列克山迤邐而東至

阿合買提山建瓴而下分溉城南各莊河岸之南
有鐵礦其基較河堤低二十餘丈脈分五條相距
五六里不等縱橫浮現長約七十里寬約十數里
附近之依克孜牙莊設爐提鍊得鐵百分之二十
或百分之五現有苗洞十數處深者丈餘因運道
不便煤炭亦艱故多折本中止

杭阿喇特山當孔道北

西域圖志杭阿喇特達巴在特勒克東一百里又

東南行接葉爾羌南境諸山

一統志杭阿喇特嶺在葉爾羌西北

案今英吉沙爾諸圖志皆不載杭阿喇特之嶺而廳西南有罕阿拉特水罕阿拉特卽杭阿喇特其水蓋以山得名其嶺當卽今烏魯克諸山古今稱名互異耳

黑子爾山黑子爾泉出焉東北流一百三十里伏於戈壁

英吉沙爾廳圖說黑子爾山東南界莎車西北距城二百一十餘里

阿伊普山

英吉沙爾廳圖說阿依普山崛起戈壁之中西北距城一百二十里東南界莎車東北界疏勒已上英吉沙爾境內支山

哈喇庫里山有水焉南流入於托布倫河

蒲犁鄉土志哈喇庫里達坂在城東一百里

案哈喇庫里嶺在齊齊克里克東南蒲犁廳東北哈喇庫里湖白西庫湖艾南湖皆在其左右奇恰克驛經其北南卽托布倫河也

鐵里牙山湯吉塔爾河水出焉南流入於托布倫河

蒲犁鄉土志鐵里牙達坂在城東二百三十里

案鐵里牙嶺在哈喇庫里東北嶺北即英吉沙

爾廳界嶺南有往莎車驛路即七里拱拜托魯

布倫等驛也

色克里克山

蒲犁鄉土志色克里克達坂在城東北四百七十

里

案鐵里牙嶺東南為色克里克嶺下為往莎車

要道

哈孜山

蒲犁鄉土志哈孜達坂在城東四百五十里

案哈孜或作黑子東距色克里克二十里為赴

莎車驛路湯吉塔爾上游支河經此山麓

哈拉山

蒲犁鄉土志哈拉達坂在城東四百四十里

案哈拉嶺在哈孜之南十里開子驛經其下右

諸山俱在托布倫河之北

喀楚特山喀楚特水出焉

案喀楚特山在蒲犁城正南明鐵蓋嶺北出之

支山西域水道記云澤普勒善河西源出喀楚

特山東北流二百餘里有齊齊克里克嶺水南流百二十里經塞勒庫勒莊東來會塞勒庫勒在葉爾羌城西南八百里案塞勒庫勒即今之

蒲犁

阿布朗山有水焉北流入於賽里河

案阿布朗或作烏帕朗在爾勒格蘇東南

爾勒格蘇山有水焉西北流入於賽里河

案爾勒格蘇山在蒲犁城南勘界公牘云蒲犁城南一百九十里之和家克巴依卡柴草均足係塔墩巴什紅孜納普爾勒格蘇三道總要之

地宜加兵扼守以重邊圉案爾勒格蘇北距和家克巴依卡六十里蓋距廳城二百五十里也

堪達山

案堪達山一作坎達爾達坂在牙滿西南蒲犁城東南由烏溪莊至枚爾羊莊經此山烏溪莊在廳城東一百五十里枚爾羊莊在廳城東南以上三山皆紅孜納普嶺北出支山

牙滿山托布倫河經其北

蒲犁鄉土志牙滿達坂在城東二百三十里

案牙滿嶺一作押慢塔斯達坂在托布倫河之

山脈四
北不當孔道嶺西八十里爲烏溪莊嶺東七十
里爲阿密里克莊

已上蒲犁境內支山

又東南曰卡拉胡魯木之嶺有水焉北流入於澤普勒
善河

皮山鄉土志卡拉胡魯木山北距皮山縣城一千
二百里西北通葉城東通伯淩吉達坂昌吉利達
坂又東迤邐至於和闐北至合達孜阿卡孜素蓋
提三達坂由阿卡孜西出葉城之八札塔拉由素
蓋提北連克里陽雅爾提達坂出和闐境

案卡拉胡魯木洪圖作喀喇闊魯木又名哈拉
合拉木勘界公牘云由素蓋提向南行進山口
八十里過達坂五十里至奇博里柴草均缺又
六十里至明立克卡七十里至達爾烏孜與康
挖克道會又五十里至黑子里塔哈轉向西南
行四十里至八浪沙卽洪圖之布朗薩沿途柴
草全無又行五十里至卡拉胡魯木達坂通退
擺特卽條西南流之水卽澤普勒善河源也詢
有鐵鑄界碑埋藏此地距界碑約三里許有石
砌三角墩每方七尺高三尺樹石碑於墩上書

皆洋文案據李源鈞圖素蓋提至卡拉胡魯木
嶺三百五十里

協坦耿山

莎車府圖說協坦耿山在城西南一百六十里與
蒲犁界當驛道南

海立雅山

莎車府圖說海立雅山在城西南三百餘里山高
三千三十四生的米達一生的米達合中尺三分零澤普勒善河經
其北麓下有渡船

鐵格山其北麓泉水出焉北流入於澤普勒善河

莎車府圖說鐵格山在海立雅山南東界葉城西
界蒲犁山高三千六百二十五生的米達其泉北
流會喇斯庫木水入於澤普勒善河

已上莎車境內支山

密爾岱山奇盤之水出焉是生玉石多犛牛獐狢狐
西域圖志密爾岱塔克舊音關爾在葉爾羌西南
原作東南由是東行接和闐南境諸山俱產玉

一統志密爾岱山在葉爾羌南產玉石
新疆圖說密爾岱山在葉城西南三百四十里奇
盤水亦名達燕水發源此山東流一百里至奇盤

莊折而北流五十里至一西泥而入葉城境又流六十里至慶木郝與澤普勒善河會

西域水道記密爾岱舊作闐勒自葉爾羌城南七十里至波斯恰木又西南五十里至汗亮格爾又東南百五十里至英額莊又西南三十里至齊盤山又西南五十里至阿子汗薩爾又西南六十里至密爾岱山峻三十里許四時積雪谷深六十餘里山三成下成者麓上成者巔皆石也中一成則瓊瑤函之彌望無際故曰玉山採者乘犛牛至其巔鑿之墜而後取往往重千萬觔山與瑪爾胡魯

克山峯巒相屬玉色黝而質堅聲清越以長乾隆二十七年八月葉爾羌辦事採進玉特磬料十一片重千四百三十觔姑洗磬二林鐘磬三南呂磬三蕤賓磬夷則磬仲呂磬各一十月進玉特磬料十三片重千五百九十觔太簇磬五夷則磬一大呂磬二夾鐘磬二仲呂磬二林鐘磬一是歲又進玉特磬料十四片重九百五十五觔蕤賓磬三夷則磬二林鐘磬一南呂磬五應鐘磬三又重華宮半度玉特磬料十片重八十觔太簇磬姑洗磬蕤賓磬夷則磬無射磬大呂磬仲呂磬林鐘磬南呂

磬應鐘磬各一備用半度磬三片重二十九觔六兩二十八年三月採進正項磬料十八片備用磬料二十六片六月復進正項特磬料十二片黃鐘磬二太簇磬二大呂磬二夾鐘磬五備用特磬十片黃鐘磬六太簇磬二姑洗磬二大呂磬一皆採自密爾岱山以準格爾鋸截之四十九年葉爾羌辦事差主事協同內庭司庫恭陳委領催七十二玉匠永福潤安詣山採正用玉冊五百片玉寶五十方備用玉冊三百片玉寶三十方凡重四千七百五十二觔五十五年內廷樂房災火樂器葉

爾羌辦事採進磬料正玉六十四塊副玉八塊其瑪爾瑚魯克山所產青質黑暈若血沁然同民自裕勒阿里克卡倫來城鬻之因名其玉曰裕勒阿里克高斌傳曰斌孫樸奏言乾隆四十一年往葉爾羌辦事距葉爾羌城四百餘里有密爾岱山產玉久經封禁四十三年二月高樸奏言同民往往私採防範維艱莫若以官爲開採間年一次可杜攘竊營私之弊如所請行九月阿齊木伯克色提巴勒底以高樸勒派同民三千餘採玉婪索金寶並串商盜賣首之烏什辦事永貴遂革高樸職鞫

實論斬如律自是設密爾岱卡倫禁採玉嘉慶四

年弛禁廢卡倫凡葉爾羌和闐產玉常貢外聽民

販鬻嘉慶四年奉 上諭葉爾羌和闐等處出產玉石向聽民間售買並無例禁明文因高樸申通商販採買玉石案內始行定例凡私赴新

疆偷販玉石即照竊盜例計贓論罪原非舊例所有況仍有偷帶貨賣者今查案內因此拖累多人朕心殊為不忍著照刑部議嗣後收買新疆玉石無論已未成器概免治罪欽此

其年有採進密爾岱山玉三首者青重

萬觔次者葱白重八千觔小者白重三千餘觔輦

至喀喇沙爾以其勞人罷之余經烏沙克塔勒回語

克小也塔勒柳樹也軍台在喀喇沙爾城東北二百二十里 土人導余至驛舍東北觀之

半沒塵壤出地者高二尺許英額齊盤山北為澤普勒善河東北流百數十里逕和什阿喇

布莊北回語和什雙岐之謂阿喇布帕爾西語水也莊在葉爾羌城西南二百六十里是為採玉第六營營在南岸又東北流四十里逕喀崇莊南是為

第五營又東北流六十里逕阿爾瑪斯莊南有密爾岱泉水自南來會是為

第四營二營在北岸又東北流五十里逕塔爾哈奇莊北是為第三營又東

北流三十里逕烏魯克明莊北是為第二營又東北流三十里逕烏魯克圖

必莊北是為第一營三營在南岸又東北七十里逕葉爾羌城南河水屆秋

澄清見底協辦率主事一人筆帖式侍衛各二人詣河干祭以少牢眾伯克

以同夫五百人來會十夫一温巴什領之執旗於岸役夫杖策沂流以採比

暮伯克斂所得玉於辦事營帳差其輕重在二兩下者不入數三日一移營

復令二筆帖式率四品商伯克一人六品伯克四人同夫二百八人喀崇山

谷探足額乃告謝河伯宴伯克獎夫役之勞者還納玉於糧餉局 至乾

隆二十四年高樸疏言葉爾羌大河來自產磬片

之闢勒山順流而下至揚瓦里克為洗伯過渡之

所渡口上流三十里即採玉之處案葉爾羌河向

不產玉自平定回疆以後漸生玉石經前任大臣

奏明採揀然每年可貢者不過數十塊質尚遜於

和闐續經前任大臣採獲白玉三塊於乾隆四十年十二月致祭河神近年得玉頗有似和闐者

案洪亮吉昆侖山釋據酒泉太守馬岌酒泉南山卽昆侖之體之語謂昆侖之首在西域而其體則綿亘南山以下均謂之昆侖昆侖爲產玉之山今南山自葉城至於闐皆產玉而密爾岱爲最大半嶺以上純玉無石故世又呼爲玉山水經注云莎車有鐵山出青玉李光庭漢西域圖考亦謂莎車國今之葉爾羌有鐵山出青玉皆指今之葉爾羌西南之密爾岱山而言密

爾岱舊作闐勒山亦作闐爾山急讀之則皮山

也攷西山經黃帝取崧

讀如密穆天子傳注文
選李善注引此直作密

山之玉

榮而投之鍾山之陽瑾瑜之玉爲良堅栗精密潤澤而有光槐江之山其上多琅玕全玉長留之山多文玉石章莪之山多瑤碧符惕之山多金玉驪山多玉而無石沕山其上多嬰短之玉其陽多瑾瑜之玉翼望之山多金玉揆厥地望當在今莎車和闐之間疑所謂密爾岱于闐南山者皆是而崧密同聲沕山因沕澤得名尤爲塙鑿可信故古來言昆侖者兼屬之南山也

龔崇云塔里木河發源葱嶺匯流於羅布淖爾中產玉石甚多大者如盤如斗小者如拳如栗各色不同其如雪之白翠之青蠟之黃丹之赤墨之黑者為上品一種羊脂米斑一種碧如波斯茶金片透濕者尤為無上上品土人亦不多得蓋和闐河上下均出玉直流至羅布淖爾山經所謂其間盡澤是也往者康熙時遣人探河源入衛藏始定

岡底斯山為昆侖不問其玉不玉也平定張穆亦謂山經產玉之山處處有之昆侖不必產玉產玉不必昆侖又斥火炎昆岡玉石俱焚為偽書以為爾雅中下二篇多後人增益於是主葱嶺南山者一變而為岡底斯山矣漢武按古圖書指河所出為昆侖且言多玉石蓋指南山而言楚辭涉江曰登昆侖兮餐玉英是又漢以前

以南山為昆侖之一證也又何疑於爾雅允征乎

裕勒阿里克山

案同語裕勒淨貌謂渠為阿里克山下有清水渠故名裕勒阿里克卡倫在其下東北距葉城縣二百九十里玉拉里克水蓋以此山得名玉拉里克即裕勒阿里克也

英額齊盤山其上多玉

西域圖志英額齊盤塔克在葉爾羌西南英額齊盤西十里與裕勒阿里克塔克東西相望俱在葉

爾羌謬斯騰境內其南境爲裕勒阿里克塔克
葉城鄉土志英額齊盤山在縣城西南二百八十
里山上平坦寬曠周百餘里產玉鮮有佳品遜於
和闐居民間有採取者

阿格里山有水焉北流入於澤普勒善河

案阿格里山東北距葉城九百七十里勘界公
牘云由星硤阿格嘴向東北行百二十里至和
勒格蘇柴水足草無一百二十里過阿格里達
坂柴水草俱有與蘇合外提路會蓋星硤嶺迤
東北出之支山也

英艾山聽雜布河東源出其北

案勘界公牘云由葉城縣向西南歷庫庫卡越
英艾達坂蓋可卡提嶺分支西行者也

瑪爾胡魯克山庫庫雅水出焉北流入於聽雜布河

新疆圖說瑪爾胡魯克山在葉城西南三百里

案瑪爾胡魯克在英艾山西北

八札塔拉山有水焉西北流入於澤普勒善河

案八札塔拉山在葉城西南阿格里山東北距
英艾一百二十里爲星硤嶺迤東北出之支山

通喬堡

爾帶克沙的山有水焉西北流入於澤普勒善河

案爾帶克沙的山東南距八札塔拉四十里東

北距英艾八十里為通怕合浦之道

庫克雅爾山

西域圖志庫克雅爾塔克在裕勒阿里克東南聽

雜布誇斯騰發源山中

案庫克雅爾即庫庫雅爾回語庫克青色雅爾

坎也山色青下臨坎故名在英艾山北故所出

之水皆聽雜布河源也

伯什鐵列克山庫庫雅水東北流二百四十里經其

北麓

案伯什鐵列克山在葉城縣南六七十里庫克

雅爾山之北

已上葉城境內支山

貝拉山

西域圖志貝拉塔克在庫克雅爾東北

一統志貝拉山在葉爾羌東南

案皮山鄉土志縣城西南一百八十里有波內

莊洪圖許圖作博喇蓋即貝拉之轉音其地正

當庫克雅爾東北

奇勒揚山

西域圖志奇勒揚塔克在貝拉南庫克雅爾東庫克雅爾奇勒揚兩塔克以南爲痕都斯坦界

一統志奇勒揚山在葉爾羌東南其南爲痕都斯坦界

案洪圖桑株山西庫庫雅山東南有吉利羊山卽此奇勒揚也山在黃綫界內故志云南爲痕都斯坦界今圖志均不載此山蓋古今異名耳和什山葉什勒之水出其東麓

西域圖志和什塔克在奇勒揚東北

一統志和什山在葉爾羌東南

案皮山鄉土志縣城南九十里爲合什塔莊蓋因山得名洪圖作呼什塔克新疆圖說正作和什塔克

桑株山桑株水出其北麓厥產黑土其樹多梨小而味甘

皮山鄉土志桑株山在縣城南其山雪水會入草湖北出一百二十里開卡孜渠又四十里開白孜渠至木吉又五十里開沙布爾渠又二十里開賽衣提拉渠又三十里開仁爾巴哈渠共注蔭一十

二莊
勘界公牘由邱邱達坂西南行七十里至垣卡春
冬水小由桑株百餘里順河而上夏秋則當繞邱
邱達坂由垣卡轉向東南行六十里至渠滾四圍
山皆青草有布魯特人十餘戶居此牧放向西南
行五十里至桑株達坂丁癸騎崙辛乙過徑山峰
極陡峭居然天險有一夫當關萬人莫敵之勢東
流轉向北流之水繞桑株莊出木吉伏戈壁山生
黑土用火炒之可代顏料

案西域圖志薩納珠塔克在薩納珠東南自英

額齊盤至此東西懸亘爲葉爾羌南境諸山皆
由葱嶺分支東南行六百餘里接和闐南境諸
山一統志云薩納珠山在葉爾羌東南山脈自
英額齊盤至此皆葱嶺之支峰薩納珠卽桑株
蓋音變字也據皮山驛站計程由縣城東南行
九十里至木吉又南行九十里至桑株莊一名哈
拉哈爾
又南行五十里至克伯孜又南行六十里至
阿卡孜又南行三十里至桑株達坂又西南行
一百三十里過達坂抵塔烏孜卡總計距縣城
三百二十里過嶺四百五十里鄉土志謂六百

餘里誤也

克里陽山產白土

皮山鄉土志克里陽山在縣城南又名居什肯其山雪水會入草湖北出一百五十里開沙狀渠又八十里開克里陽渠又三十里開玉拉格渠凡注蔭一十九莊山生白土用火炒之粉牆極白

案由皮山縣南行九十里抵合什塔又南行三十里抵司馬晒又南行二十里抵克里陽卡又南行八十里抵阿克受又南行五十里抵拉木籠又南行五十里抵居什肯卽克里陽達坂東

西高山中有草湖又東南繞西上達坂越達坂南行下達坂約計百里抵土古滿據此則由縣城至克里陽山祇三百二十里南出山亦祇四百餘里鄉土志作距城五百餘里誤

八沙拉嶺玉拉克水出其北麓北流滙於庫庫雅之河

勘界公牘由葉城縣東南一百六十里至克里陽卡再南行九十里至阿克壽草盛薪缺有敖罕種民數戶居此尙有七十餘戶在各山溝牧放又東南行九十里至拉木籠薪足草無多又南行百里

至渠坤左右兩山上下二三十里皆青色有野葱
又轉西南行六十里至八沙拉達坂壬丙騎崙甲
庚過境山極峻峭儼入雲天時寒時熱乍雨乍晴
積雪盛夏不消瘴霧時作每年自六月起九月止
人馬可行餘月皆爲雪阻山梁尙平坦

素蓋提山有蛇焉一角而虎爪可以避邪

皮山鄉土志素蓋提山在縣城南七百里

勘界公牘由葉城縣向東南歷桑株達坂至素蓋
提卡洪圖作蘇哲特計程六百五十餘里又向南
行進山口八十里過達坂五十里至奇博里卽洪

圖之池布喇也

案八沙拉桑株各嶺重巒疊嶂形勢危險皆由
素蓋提東山出脈直行西北則可卡提英艾爾
帶克沙八札塔拉嶺爲莎車葉城南障由可卡
提嶺分枝迤北而東則八沙拉接連桑株爲葉
城外東南障皆屬南山之枝節阿巴伯克里爲
兩嶺總徑截要迤東則賽圖拉迤南爲哈里渠
坤柴草茂盛可屯千軍踰可卡提嶺出山口卽
澤普勒善河計程約二百里由山口順河直趨
八札塔拉卡可扼坎巨提由星硤紅孜納普各

嶺入葉城各道而不能兼顧條拜提由卡拉胡魯木來路惟在可卡提山口駐兵扼守不獨與素蓋提賽圖拉聲氣聯絡卽與八札塔拉卡亦一氣貫注其中數百里可資軍用而素蓋提卡亦爲要隘其南逾嶺直趨卡拉胡魯木東四百一十里達阿吉闌干有通和闐之道迤東諸山爲呢蟒依山係和闐南障接連普下大山又屬和闐西障也

可卡提山

勘界公牘由八沙拉達坂東南行二百三十里至

阿巴伯克與桑株道會向南行十二里至托古爾蘇由英艾達坂以東諸山之水出此向東南行三十里至賽圖拉洪圖作沙音都拉又名叶的拉未經平定之先商賈往來多被坎巨提人劫掠土著布回亦受其害英人於沙灘中就我舊堡加修周圍二十二丈有奇南北方寬五丈東西方寬六丈有奇堡身高九尺厚約四尺堞口高三尺厚約七寸房屋十一間馬棚二區向東南進山口爲哈里渠坤柴草蕃茂能供數營之需百餘里踰可卡提達坂出山口沙梁橫互有石砌舊房基十數礮臺

一座若仍設兵防守與素蓋提一帶防兵聲勢聯絡可扼條拜提由卡拉胡魯木昌器利滿兩道矣案賽圖拉英人所築卡房係英使楊哈斯班遊歷至此僱同人士的修等修葺我舊堡給以火藥以保護往來商賈實則華疆也今已杳無人迹矣

阿卡孜山

案皮山鄉土志阿卡孜山一名阿哈塔黑洪圖作阿克塔克據驛站計程由皮山縣城至阿哈塔黑八百七十里北距素蓋提山一百八十里

合達孜山

案皮山鄉土志合達孜一作特哇孜色立克勘界公牘云由素蓋提達坂南行二百三十里至黑子里塔哈轉向西南行九十里至卡拉胡魯木達坂黑子里塔哈即合達孜也據鄉土志特哇孜色立克北距明立克下三十里據皮山驛站計程由縣城南出克里陽山四百二十里又二百九十里出素蓋提山又三百二十五里抵特哇孜色立克共一千三十餘里

普下山哈喇哈什河經其西北

皮山鄉土志普下山在縣城東南七百八十里此處係大山窩有居民十數戶不通車馬罕見人迹
雅爾提山

皮山鄉土志雅爾提山一名蘇皮哈拉哈爾距縣城東南五百餘里其山雪水會入草湖北出二百五十里注杜哇莊又一百二十里注帕爾慢莊

案雅爾提一作牙玉特

陽阿里克山

新疆圖說陽阿里克山在葉城東南四百七十二里

案陽阿里克山在普下山西北杜哇山西南
杜哇山有泉出焉

皮山鄉土志杜哇山在縣城東南二百餘里厥產紅土

案由帕爾慢驛南行六十里抵杜哇莊莊在山東雅爾提山雪水注之山生紅土用火炒之可作顏料

帕爾慢山

皮山鄉土志帕爾慢山距縣城東南二百餘里
案皮山城東二百四十里爲帕爾慢莊有帕爾

山脈四
三
慢驛在杜哇水東通和闐

邱邱山

勘界公牘由葉城縣東南行一百里至波內莊卽
洪圖博喇六十里至克里陽卡轉向東行六十里
至和什拉莊卽洪圖呼什塔克又一百里至桑株
莊仍向東行六十里至黑子爾校闌干樹多草少
向西南行七十里至麻札薪足草缺又四十里至
邱邱土達坂四山草極蕃茂

己上皮山境內支山

又東南曰昌器利滿之嶺有水焉東流伏於戈壁

李源鈔勘界圖由葉城縣東南行歷桑株達坂至
素蓋提計程六百五十餘里折而正東行至阿吉
闌干計程四百一十里由此轉西南折正南至昌
器利滿達坂計程五百七十里

案昌器利滿嶺與條拜提接壤條商向由卡拉
胡魯木往來嗣因坎部擾亂改道由此嶺直入
于和承平後仍歸故道勘界公牘云由阿吉闌
干有三大石倚石砌墻垣數處以東石山中北流
清水由此伏流至色勒格蘇與諸南山中北流
黃泥水會皆哈拉哈什河源也正南上山坡路

平坦過小土達坂據土人云向東北行有通于
闐之道計八十里至布拉可巴什柴草均缺有
數泉流入小冰海泉邊青草無多向西南行八
十里至克子布拉可山麓皆紅土柴草均缺有
數小海水碧色味鹹結又行一百一十里平坦
曠戈壁至塔勒塔得柴草均缺又行七十里平
坦山路至克奇克庫里亦有數泉流十餘里伏
於地泉邊青草難供一騎仍向西南四十里平
坦山路轉向正南六十里土戈壁一帶風甚烈
有水處早晚皆結冰六月披裘儼如嚴冬瘴霧

尤厲觸之頭腹皆痛疑爲崑岡絕頂也過小土
達坂二十餘里仍土戈壁沿路柴草俱無昌器
利滿達坂諸山中之水由此繞向東流從茲漸
有高峰矣順山溝向東南行三十餘里轉正南
折西南六十餘里至昌器利滿達坂通退擺特
柴草全無用羅經測準子午騎崙卯酉過徑比
用木板鐫數語云查昌器利滿達坂卯酉向水
分東西流東流屬中西流屬外騎崙分界中外
分明誠天然界限也書此爲記離山梁路南約
二十步埋藏石塊內此嶺及諸峰多積雪盛暑

不消俄人康穆才甫游記云涉一高平地砂磧
含鱗上有數湖卽鱗戈壁數小海也昌器利滿
獨起高峰天然擘劃順山嶺迤西北則卡拉胡
魯木達坂卽喀喇科隴皆屬新疆通條拜提第
一層門戶也

又東曰札克安巴之嶺

案札克安巴嶺卽新疆識略之察克瑪克曲底
雪山在呢蟒依山東南通後藏

又東北曰呢蟒依之山一曰哈朗歸南望痕都斯坦東
望和闐和闐水出其陰北流注於塔里木河其中多玉

西域圖志哈朗歸塔克舊音哈朗圭在和闐西南
境阜窪勒南又東南爲額什墨提斯塔克皆屬和
闐南境之山亦自葱嶺分支過葉爾羌南境又東
行至此和闐郭勒出其北麓
一統志呢蟒依山在和闐南東西有二山和闐河
分出其麓

西域水道記和闐河有二源西源曰哈喇哈什河
東源曰玉瓏哈什河玉瓏哈什亦有二源西源出
哈朗歸東源出雪山二源會流至額克里雅爾與
哈喇哈什會後魏書云于闐城東二十里有大水

北流號樹枝水即黃河也一名計式水城西五十
五里上五字衍文後周書北史皆作十五里亦有大水名達利水與樹枝水
會俱北流樹枝即東源達利為西源河產玉諺曰
玉河漢書西域傳言于闐多玉梁書西南夷傳有
于闐玉河是其名稱從來已久高居誨使于闐記
云于闐河分為三東曰白玉河西曰綠玉河又西
曰烏玉河張匡鄴行程記云白玉河在城東三十
里綠玉河在城西二十里烏玉河在綠玉河西七
里其源雖一而其玉隨地而變每歲七八月水退
乃可取謂之撈玉據斯言白者玉瓏綠者哈喇烏

阜
Isao
黑

者為阜窪勒惟今之阜窪勒未聞出玉差為異矣
案阜窪勒河在和闐西即哈喇哈什河
之分流北行百餘里而止不通他水
和闐鄉土志呢蟒依山距州城五百八十里山勢
險峻堅冰積雪人迹罕到
案漢書西域傳云于闐在南山下南山者土人
稱密克瑪克曲底雪山在和闐額里齊城南五
百八十里額里齊同語居民環城
之謂舊音作伊立齊漢書言南山者以別
葱嶺文獻通考言于闐都葱嶺之北二百餘里
以葱嶺為南山誤矣南山水經注謂之仇摩置
有二谷曰桑谷曰樹雅二谷出水分流同人統

山脈四
呼爲桑谷樹雅金玉皆產其中東南遙達西藏
東則綿延數千里直抵青海之庫爾坤山東麓
爲巴延哈喇達巴罕北卽星宿海漢書河有二
源一出于闐南山下卽其地也魏書西域傳蒲
山國西南三里有凍凌山唐西域記王城西南
二十餘里有瞿室餒伽山山峰兩起巖隙四絕
西域圖志云魏時蒲山國爲今皮什南皮雅勒
阿勒瑪等處所謂凍凌山者當在其西南境西
域記載瞿室餒伽山在王城西南二十餘里今
和闐額里齊城西一百六十里地名皮什南城

居山谷皮什南與瞿室餒伽字音相近方位亦
符兩峰四絕之形勢猶有存者是瞿室餒伽山
當在今皮什南之南爲堅珠哈朗歸額什墨提
斯諸塔克也案南山峰嶺相屬古今異稱自回
人改譯土語而山名益不能確指其定在要之
皆爲于闐南山也哈朗歸回語黑暗也呢蟒依
回語雪也距和闐州城五百八十里新疆圖說
云呢蟒依山在城南六十里蓋和闐人謂城南
之山俱謂之呢蟒依也其山舊有小徑可通衛
藏提督董福祥勦竄賊白彥虎毀之光緒丙午

夏英人司德訥言昔我國人踰此山至於印度
必有舊徑吾將往跡焉抵哈朗歸遇急湍不可
進後易皮筏浮而下陟呢蟒依雪山未半瘴甚
從者皆嘔血遂返然度嶺之志益決考唐吐蕃
入西域東則取道於甘涼西則假途於勃律大
勃律卽今之巴勒提在博洛爾回部其界連于
闐南山雪山之險數倍於木素爾嶺小勃律則
踰葱嶺而西爲漢烏秣南境其道迂而夷故吐
蕃多由之李光庭漢西域圖考云今克勒底雅
城有路通後藏之招正注云路在正南克勒底

雅卽今之克里雅其地正當和闐于闐之南雪
山之麓彼英人之所指殆卽克里雅一途爲董
提督所毀者然雪深瘴毒猿狖愁攀矧復破蓋
益難側足故兩進而兩卻也

堅珠山

西域圖志堅珠塔克在和闐西南境阜窪勒西南
去薩納珠^{卽桑株}二百里

案阜窪勒爲和闐屬境在城西北一百二十里
由是西行踰黃水溝至葉爾羌界

瑪雜爾山

西域圖志瑪雜爾塔克在和闐郭勒西三百里爲和闐北屏山不甚高產火硝不當孔道魏書西域傳于闐地方亘千里連山相次按自瑪爾占鄂勒氏西行至瑪雜爾塔克迤邐而西連山不斷直抵葉爾羌謬斯騰當屬于闐北界魏書所謂連山相次者以此

案瑪雜爾山在和闐城北不與南山相屬

阿拉克山哈喇哈什之水出焉

案阿拉克山在和闐州西南昌器利滿嶺西北其水北流爲哈喇哈什河山皆冰雪北有小徑

庫布哈山

案庫布哈山在和闐州西南阿拉克東北其水

亦哈喇哈什河源

牙拉阿山

案牙拉阿山在和闐州西南庫布哈西北其水

亦哈喇哈什河源

乙品山

案乙品山在和闐州西南牙拉阿東北

默特司山有水焉北流入於哈喇哈什河

案默特司山在和闐州西南乙品山東其所出

之水蓋亦哈喇哈什河源也一統志額什墨提

山在和闐南卽此山

多拉山默特司之水逕其西

案多拉山在和闐州西南默特司東北

烏普阿山

案烏普阿山在和闐州西南多拉山西北

玉司馬山尼沙水經其西

案玉司馬山在和闐州南烏普阿山東南尼沙

水出呢蟒依山入於玉瓏哈什河

布倫哈山切取水經其西

案布倫哈山在和闐州南玉司馬山北切取水

出呢蟒依山東北流入於玉瓏哈什河

卡浪古山

案卡浪古山在和闐州南玉司馬山東和闐鄉

土志卡浪古明在城南二百二十五里南抵呢

蟒依山其明蓋卽以山命名纏回謂千日明猶

言千戶也山南有蘇明介乙哈拉及威衣波衣

拉克兩大牧場

忙普倫山玉瓏哈什河經其北

案忙普倫山在和闐州南卡浪古山北一名樂

春山

皮素絲山

案皮素絲山在和闐州南忙普倫山北

烏魯山

案烏魯山在和闐州東南皮素絲山東為和闐

洛浦東西界山

乙梗山有水焉西北流入於玉瓏喀什河

案乙梗山在和闐州東南與于闐縣塔枚梗莊界

已上和闐境內支山

鐵蓋列克山阿拉隆伊拉克及覺可伊拉克二水出焉西流入於玉瓏喀什河

案鐵蓋列克一作帖克里克山在洛浦縣城東南七十里于闐縣城西南四百餘里兩縣交界之山山脈由南山附玉河而來石骨嶙峋上無樹木山下有小泉二道北流一至闐干地一至白石驛山之西北一帶有沙灘名大胡麻地大胡麻地北距洛浦縣城九十里小胡麻地在縣城北三十里中產子玉為最上之品

已上洛浦境內支山

又東曰克里雅之山克里雅河水出焉多金多鹽鹽凝結成塊不

待煮煉土人任便取食多犛牛多狫狫多野牛野馬

于闐鄉土志克里雅山在縣城極南千餘里與後

藏交界

西域水道記克勒底雅山有徑通藏地康熙五十

八年六月四川總督年羹堯疏言近者西藏諸部

落以貝勒達顏病故藏衛舊汗曰藏巴汗噶爾瑪丹炯旺博有和碩特之顧實汗滅之留其地達顏即顧實

汗長子嗣為汗人人有相吞併意聞策零敦多布現合左哨

頭目春丕勒率兵六百餘過喀喇烏蘇河往青海

又聞發兵八千來藏已至葉爾羌克勒底雅雍正

元年六月青海羅布藏丹津顧實汗之孫達什巴圖爾之子襲和碩親王以叛削爵將

由克勒底雅入藏松潘鎮總兵官周瑛選精騎三

百勒康濟鼎西番語作康臣罷索特納木佳勒博漢字從轉音稱康濟鼎初為阿里噶爾本封貝子後辦噶卜倫事帶

番兵萬餘由楊八景追至噶勒藏骨岔限雪乃止

西藏志曰自衛藏招正北行二十四日至納克產

又十五日至書隆沙爾又十八日至克勒底雅城

是也西藏志又云自阿里西北所屬之魯都克城十五日至葉爾羌蓋有兩路可達克勒底雅在藏正北葉爾羌在藏西北也克勒

底雅山千餘里淤沙積雪煙瘴逼人冬夏不可行

水發山中北流經克勒底雅城東

案準部由回疆擾藏叛會由青海竄藏皆嘗取

道於此即唐吐蕃入西域之路也克里雅者回

語來而未定之辭山之西南有伊爾里克淖爾

水自淖爾溢出是為克里雅河初源東北流流

水山之水自東南來入之流水山在于閩縣境南產礫子石水出山中淺狹曲折西北流

又北流普羅山之水自西南來入之普羅即勃律之轉音蓋古

大勃律之界也在于閩縣境正南有二水一出正南山中曰帖拉克一出迤西南山中曰庫下拉克流出普羅山東北流與大河合又

東北流經博瓦子闌干莊分為東西二渠渠在河

又東流分一渠渠在河南岸又東北流分二枝東西分

流環抱阿雅莊行二十餘里仍合流經于閩縣

城東唐書云于闐東三百里有建德力河河東有建德力城亦曰拘彌城即甯彌故城建德力河即此河也今河在城東城郭遷移

不足又北流阿羌山之水自東南來入之阿羌山水出于閩縣南阿

羌山中北流經縣東哈喇庫木什莊折而西北入大河又北流皮介山水合哈喇布

拉克水圖木牙水自東來入之皮介山水出皮介山北流喀喇布拉克水自東

南來會水出喀喇布拉克山西北流入皮介山水又北流圖木牙水自東來會水出圖木牙山北流分二枝一北流注乙斯玉洛滾一西流入皮介山水三水合流經威陀拉克又北流入沙磧此河自

莊折而西經自新莊又西入大河

發源至于閩縣城約一千二百餘里夏漲冬涸

灌溉之利實攸賴焉又北流約千里始入沙磧

沿河有草土人資以畜牧再北則彌望沙漠寸

草不生考唐辨機西域志謂之媿摩川東入沙

磧新疆識略水道表亦列為伏流是此水並不

入大河西域水道記以此河注葱嶺大河入羅布淖爾殆未經親歷耳

喀喇塔什山喀喇塔什之水出其北麓產金

于闐鄉土志喀喇塔什在縣城西四百五十里鐵蓋列克山東

案喀喇塔什河出山中北流經阿希闐干爲阿希河又北流經策勒村爲策勒河又北流入沙磧

卡依拉乞莽山沁美勒克河水出焉

于闐鄉土志卡依拉乞莽山在縣城南五百餘里

喀喇塔什山南

案卡依拉乞莽山在于闐縣境努勒村南沁美勒克河出山北北流經安壩莊曰安壩河安壩莊距雪山近水草饒足居民且耕且牧又北流經恰哈莊曰恰哈河又北流經固拉哈馬爲固拉哈馬河

在縣城西一百九十里

又北流分渠之後入沙磧

阿克恰克勒山潘拉克水出焉

于闐鄉土志阿克恰克勒山在縣城南六百八十里卡依拉乞莽山東

案阿克恰克勒山在縣境南水源出其北北流

經烏魯沙依莊東爲烏魯沙依水又北流分渠
之後至潘拉克入沙磧約六百里

努拉山

于闐鄉土志努拉山在縣南六百餘里阿克恰克
勒山東

案努拉山在于闐縣境南水源出山北經努拉
莊北流會沙依巴克水分渠溉田

沙依巴克山沙依巴克水出焉

于闐鄉土志沙依巴克山在縣城南五百餘里努
拉山東

案沙依巴克山在于闐縣南水源出其北北流
至達木溝分渠之後入沙磧

細黑喇山罕蘭溝水出焉

于闐鄉土志細黑喇山在縣城南四百餘里沙依
巴克山北

案細黑喇山在于闐縣境南水源出山北北流
分二支一西北流入達木溝一東北流爲罕蘭
溝水初源分渠之後北流入沙磧

吉比塔哈山

于闐鄉土志吉比塔哈山在縣城南三百餘里細

黑拉山迤南

科可布拉克山

于闐鄉土志科可布拉克山在縣城南三百餘里

吉比塔哈山東

普羅山

于闐鄉土志普羅山在縣城南二百六十里科可

布拉克山東北

案普羅或作泡洛即勃律之轉音蓋古大勃律

之界在縣境正南有二水一出正南山中曰帖

拉克一出迤西南山中曰庫卜拉合流出普羅

山東北流與克里雅河合

科可牙山

于闐鄉土志科可牙山在縣城極南七百餘里普

羅山南

案科可牙或作克雅得牙右十山為克里雅迤

西諸山俱在塔克努明境內

流水山有水焉產礫子玉

于闐鄉土志流水山在縣城南二百五十餘里普

羅山東

案流水山在于闐縣境南水出山中淺狹曲折

西北流入克里雅河

索胡塔雅克山

于闐鄉土志索胡塔雅克山在縣城南二百八十二里
餘里流水山迤東

案索胡塔雅克洪圖作索克托雅

阿羌山阿羌水出焉

于闐鄉土志阿羌一作阿仙山在縣城南三百二十里
十里索胡塔雅克迤東

案阿羌洪圖作阿禪阿羌水出阿羌山中北流
經于闐縣東喀喇庫木什莊折而西北入克里

雅河

皮介山有水焉北流入於克里雅河

于闐鄉土志皮介山在縣城南三百五十里阿羌
山迤東

案皮介山或作必佳山有水北流會喀喇布拉
克及圖木牙兩山之水自新莊入於克里雅河

喀喇布拉克山有水焉入於皮介之河

于闐鄉土志喀喇布拉克山在縣城南三百八十
里皮介山迤東

圖木牙山有水焉西北流入於皮介之河

于闐鄉土志圖木牙山在縣城南四百一十里喀喇布拉克山迤東或作吐木牙

瑪勒袞山

于闐鄉土志瑪勒袞山在縣城南四百五十里圖木牙山迤東

三姜山

于闐鄉土志三姜山在縣城南四百七十里瑪勒袞山迤東北

瑪特山

于闐鄉土志瑪特山在縣城南四百八十里三姜

山迤東

庫烏瓦山

于闐鄉土志庫烏瓦山在縣城南四百九十里瑪

特山迤東

恰哈提山

于闐鄉土志恰哈提山在縣城東南五百餘里庫烏瓦山迤東

案恰哈提或作洽哈底山北有水東北流入於

烏魯克沙依之河

依馬山烏魯克沙依之水出焉

于闐鄉土志俠馬山在縣城東南五百二十里恰
哈提山迤東

案俠馬或作下馬勒山在縣境東南水源出山
北曰烏魯克沙依河北流至尼雅爲尼雅河分
渠之後入沙磧

蘇拉瓦克山

于闐鄉土志蘇拉瓦克山在縣城東南三百二十
餘里俠馬山迤北

案蘇拉瓦克或作梭羅瓦克洪圖作索爾曼克
卽大金廠在于闐縣境東譯言當風揚沙也蓋

以土人挖金當風揚沙得名

達爾千里克山

于闐鄉土志達爾千里克山在縣城東南五百七
十餘里俠馬山迤東或作他拉竿

奇吉罕山

于闐鄉土志奇吉罕山在縣城東南六百一十里
達爾千里克山迤北

乙衣克山

于闐鄉土志乙衣克山在縣城南六百五十里奇
吉罕山迤東

格支布拉克山

于闐鄉土志格支布拉克山在縣城東南六百八十里乙衣克迤東

玉洛袞布拉克山

于闐鄉土志玉洛袞布拉克山在縣城東南七百

里格支布拉克山迤東南

英吉介山哈爾哈什水經其東

于闐鄉土志英吉介山在縣城東南七百一十五里玉洛袞布拉克迤東或作英豈介

圖朗和加山哈爾哈什水經其西

于闐鄉土志圖朗和加山在縣城東南七百七十里英吉介山迤東一作托蘭烏佳

喀喇沙衣山喀喇沙衣之水出焉東北流入於安得月河

于闐鄉土志喀喇沙衣山在縣城東南八百五十五里圖朗和加山迤東

案喀喇沙衣水出山北北流至安得月入沙磧三加山有水焉東北流入於安得月河

案三加水出于子塔哈西南山中北流又折而
東北入安得月河

于子塔哈山安得月水出焉

于闐鄉土志于子塔哈山在縣城東南九百里三
加山東南

案安得月河發源於于子塔哈山曰波斯坦托
合拉克北流入沙磧洪圖安得月作安得喇

克子里雅山克子里雅水出焉

于闐鄉土志克子里雅山在縣城東南九百五十
里于子塔哈山東南

案克子里雅山在于子塔哈山東南水源出山
西于子塔哈迤東山中諸小水自南來會合流
西入於安得月河

阿斯敦塔哈山有小水三焉出其北麓

于闐鄉土志阿斯敦塔哈山在縣城東南九百餘
里于子塔哈山迤北

案阿斯敦塔哈山在于子塔哈山北其水曰克
奇克色干曰穹色干曰博和布拉克均發源於
山北北流又折而西入於安得月河

阿卜山阿卜水出焉

于闐鄉土志阿卜山在縣城東南九百三十里阿
斯敦塔哈山迤東

案阿卜或作阿拔坦山在阿斯敦塔哈之東阿
卜水出其北北流奇底里水自東北來會此水
亦出阿卜北山之麓合流入於安得月河

窩牙衣拉克山

于闐鄉土志窩牙衣拉克山在縣城東南九百八
十里阿卜山迤東或作阿衣乙拉哈

布胡拉山

于闐鄉土志布胡拉山在縣城東南一千里窩牙

衣拉克山迤東

昆洛克沙衣恰克勒山

于闐鄉土志昆洛克沙衣恰克勒山在縣城東南
一千五十餘里布胡拉迤東

奇底里克恰克勒山

于闐鄉土志奇底里克恰克勒山在縣城東南一
千一百餘里昆洛克沙衣恰克勒山東南

枚勒卡恰克勒山

于闐鄉土志枚勒卡恰克勒山在縣城東南一千
二百餘里奇底里克恰克勒山東北

卡巴山產金

于闐鄉土志卡巴山在縣城東南一千二百餘里
枚勒卡恰克勒山西北即小金廠

案洪圖卡巴作闊帕或作卡拔

麥衣提山麥衣提河水出焉北流入於戈壁

于闐鄉土志麥衣提山在縣城東南一千二百八
十里卡巴山迤東或作密提

托和巴衣山

于闐鄉土志托和巴衣山在縣城東南一千三百
餘里麥衣提山東南

卡勒木南山

于闐鄉土志卡勒木南山在縣城東南一千三百
三十餘里托和巴衣山東北或作哈拉敏

烏爾拉克羌山

于闐鄉土志烏爾拉克羌山在縣城東南一千三
百五十餘里卡勒木南山迤東或作阿祥

伊三干山

于闐鄉土志伊三干山在縣城東南一千三百八
十餘里烏爾拉克羌山迤東或作一山干

阿克牙山

于闐鄉土志阿克牙山在縣城東南一千四百餘里伊三干山迤東

庫朗木拉克山

于闐鄉土志庫朗木拉克山在縣城東南一千四百五十餘里阿克牙山迤東

跳提勒山

于闐鄉土志跳提勒山在縣城東南一千五百二十里庫朗木拉克山迤東

覺可沙衣山有水焉北流入於卡墻河

于闐鄉土志覺可沙衣山在縣城東南一千七百

餘里跳提勒山東南

摩拉布拉克山有水焉北流入於卡墻河

于闐鄉土志摩拉布拉克山在縣城東南一千九百餘里覺可沙衣山東南或作毛拉布拉河

托固斯嶺

于闐鄉土志托固斯達坂在縣城東南二千餘里摩拉布拉克山迤南

案托固斯洪圖作托古茲此為東南分支過脈大嶺

烏魯克蘇山烏魯克蘇水出焉是為卡墻河之源

于闐鄉土志烏魯克蘇山在縣城東南二千四百餘里托固斯達坂迤東

案卡墻河有三源一爲烏魯克蘇一爲阿格塔克一爲阿里雅拉克三水合流是爲卡墻河西流經摩拉布拉克山又北流折而東北經婁羌縣入於羅布淖爾水經注且末河卽此卡墻河蓋音轉字卡牆且末故地也石晉高居誨使于闐記云又西渡陷河是古時出陽關赴于闐必由鹽澤渡且末今由卡牆至羅布淖爾必渡此河以道路證之實且末河也西域水道記載羅

布淖爾所受諸水不列此河

阿格山阿格塔克水出焉是生金

于闐鄉土志阿克塔克在縣城東南二千五百餘里烏魯克蘇山東南

案阿格塔克在于闐縣境東南纏回謂後爲阿格謂山爲塔克猶華言後山也其地產金積雪不消瘴癘亦甚採金者惟夏月可入水出山中西北流與烏魯克蘇合入阿里雅拉克河
阿里雅拉克山阿里雅拉克水出焉

于闐鄉土志阿里雅拉克山在縣城極東二千六

百餘里阿格塔克東與青海界

阿克蘇阿子山

于闐鄉土志阿克蘇阿子山在縣城東南二千四百餘里阿格塔克迤北

牙烏拉克山

于闐鄉土志牙烏拉克山在縣城東南二千四百六十餘里阿克蘇阿子山迤東

黑子龍溝山

于闐鄉土志黑子龍溝山在縣城東南二千五百餘里牙烏拉克山迤東

案右四十九山俱在克里雅明境內為克里雅迤東諸山

已上于闐境內支山

又東曰沙圖圖之嶺

一統志沙圖圖嶺在和闐東境外自塔克邨踰葉什勒淖爾南東行沙磧六百里至此山勢趨北岡巒連屬不絕

西域水道記沙圖圖嶺南北與哈喇沙爾城直中隔千四百餘里嶺北趨四百餘里折而西北千二百餘里至布古斯孔郭爾郭之南而止

山脈四

三

同語孔郭爾郭野果名布古斯廬

謂腹借以喻果實之大也地在額里齊城東北五百餘里距噶巴克阿克集近百里其境南皆沙磧中有大山綿亘沙圖圖嶺支峰也

案回語圖圖梯也沙圖圖狀其層出

又東北曰額勒圖郭勒之嶺

一統志額勒圖郭勒山在和闐東境外沙圖圖嶺之東北四百餘里特起大山支峰延亘沙磧中

又東北沙磧中有山曰礪什達爾烏蘭達布遜之山多紅鹽礪砂

一統志礪什達爾烏蘭達布遜山在和闐東境外額勒圖郭勒山之東北踣踞沙磧其東偏連山不斷與安西州屬南山相望

西域水道記礪什達爾烏蘭達布遜山南北與羅布淖爾直中隔千里其山高峰崛起西北行二百餘里分二支南支西行二百餘里爲順托郭爾山而止北支西北行千四百餘里轉西至沙雅爾之南陲而止

案回語礪砂曰礪什達爾鹽曰達布遜山產礪砂紅鹽故名明華夷譯語鹽曰答不遜卽達不遜也或作勒科爾烏蘭達不遜

又東南曰錫津烏蘭之山

西域水道記錫津烏蘭山南北與吐魯番城直中

隔千四百餘里

又東北曰巴顏哈喇得里奔巴之山

西域水道記巴顏哈喇得里奔巴山之西二百里
分支西北行一千里至羅布淖爾南八十里而止
支山之東爲瑪海沙磧周二千餘里當哈喇淖爾
之西又東北爲噶順

蒙古語噶順味之
苦者言水味苦也

沙磧又北爲伊

爾瑚瑪沙磧當哈密城西南蓋和闐東北大漠無
垠辨幾西城記云于闐東行人流沙沙礫流漫聚
散際流人行無跡遂多迷路四遠茫茫莫知所指
行四百餘里至覩貨羅故國國久空曠城皆荒蕪

從此東行六百餘里至折摩馱那故國卽沮末地
也城郭巋然人烟斷絕從此東行千餘里至納縛
波故國卽樓蘭是知沙磧計程二千里而遙漢渠
勒精絕戎盧小宛諸國淹沒無蹤意淪入瀚海如
曷勞落迦城之比矣

案西域水道記錫津烏蘭及巴顏哈喇得里奔
巴山後有諾木齊圖山巴顏哈喇西倫山陰得
爾錫勒圖山奇爾薩托羅海山巴顏哈喇嶺七
山凡六百餘里皆南山一脈相屬入青海界內
矣

山只六

山只六

山只六

山只六

山只六

山脈志卷四終

